



Nuvipiri 6, 2023

Inulimaanut Matuinngatitaullutik Titiraqtangit Inuit Tapiriit Kanatami Tusaqtittisimaliriarutigillugit Canadamiunut Saglujjutiqaqsimallutik Inuuniraqsimalauqtunnut

Taakkua titiqqat titiraqtausimammata tusaumajauliqullugit piliriarjausimaliqitunik NunatuKavut Nunaliujumi Katimajigijaujunit (NCC) piliriangujunut ilauqatauliqullugit gavamatuqakkunnit sivuliqtigijaujuit, silattuqsaqvingni iqqanaiaqtiqigijaujuit, ammalu Canadamiutaujuit sivummugiaqtausimaliqullugit maligaqutinik siqumittisimallutik ilagijauqatauniraqsutik nalunaiqsisimajjutiqaqtaunnut Inuit pijunnautigijanginnut ammalu inuuqatigiingujunut. NCC-kut qiniliqsimajut pisimaliriaksaminnut nunalirinirnit ammalu pijunnautiqarniujunut maligatigut ilagijauqatauniraqsutik nunaqaqqaqsimajunit ammaluusingitigut pisimalirasuarniusimanirnut amigalianikuullutik kiinaujaqutiksarijaujunit turaangatitausimallutik ikajuutiksauniarninginnut Inungnut, Iqqilingnut, ammalu Allangajunut.

NunatuKavut Nunaliujumi Katimajigijaungit (NCC) Inuit pijunngautingitigut tigumiaqtiullutik katujjiqatigiingunngimmata, ammalu taakkua katujjiqatigiit ilagijaunatik sitamaullutik Inuit Angirutinut Katujjiqatigiinginnut tamarmiullutik pijjutiqaqtiqigijauullutik Inulimaanut Canadami.

Ukiungusaalauqtuni, Canadamiut amisurjuammarialungnit sulinnngitsutik ilagijauqatauniraqtauninik Nunaqaqqaqsimajunit nalunaiqsivviuqattaqsimaliqput. Tamakkua piliriniusimajut aturnirlugutiullutik uqaqtaqtaqsimammata qaujijauqatauniraqtauninik amisunit Canadamiunit pijjutigillugit Nunaqaqqaqsimajuit kikkunnginnut. Saglujjutiqaqsutik ilagijauqatausimaniraqsimajut asijjiivallagajumata unikkaarisimajaminnik ammalu sanngisaqsutik nilliatittitailiniqaliqaksutik taikkuninga qaujitiqatigijauqatauniraqtauninik.

Sivurngani 2010 ukiungata, NCC-kut timiqutingat taijauvalauqsimavut Labrador-mi Allangajuit Inuuqatigiinginnik, ammalu ilagijauqatigut, piqasiutillugu angijuqqaarijaujuq Todd Russell, Allangajunut ilagijauqataullutik. Taimautillugu taakkua inuuqatigiiktuit imminnik allangajuuniraqpaktillugit, Allangajuit Canadami Katimajinginit ilitaqsisimalaunngimmata Labrador-mi Allangajuit Inuuqatigiinginnik ammalu ilauqatautitaulauratik aulatsiniqarvigijanginnut.

NunatuKavut Nunaliujumi Katimajigijaungit (NCC) tautturijanga asijjirajuktuullutik Nunaqaqqaqsimajuunatik katujjiqatigiingunngimmata ilagijauqataullutiklu amisukallammariullutik nunaqaqqaqsimajuunngittunit piliriniuliqsimavalliajunit ammalu katinniqaqsimajunit niruaqsisimaniqaqpalliajunit nunaqaqqaqsimajunit ilagijauqatauniraqsimajunit, piusituqanginnut,

ammalu atuqsimajaminnik uqaqsimajunut pisimalirasuarutigillugit kiinaujatigut ikajuusiaqtaanguvaktunit ammalu pijunnautigijaujunit.

Inuit atausiullutik inuuqatigiingummata, ammalu amiqqarutiqaqtuulluta atuqsimajattinnik, uqausittinnik, piusituqarijattinnik ammalu inuusirijattinnik Inuulluta. attataqsimaturaunnattat tamakkutiguunaq ammalu inuuqatigiinnittigut ammalu ilagiingujuit attataqsimaningitigut. Inuit qaujimmattarmata kinaunirminnik ammalu naniinninginik qaujimmattiaqsutik Canadamiungunirminni ammalu silarjuap ukiuqtaqtulimaanganirmiunit.

Inuit Tapiriit Kanatami (ITK) pijitsiraqtiusimavut Canadalimaami Inungnut pijjutiqaqtigijauullutik katujjiqatigiingunirmiktigut ukiunut 50-ujut ungataanuaqsimaliqtunut. Pijitsiraqtiuvugu ammalu tiliuqtausimavaksuta piliriaksarijattinnik Inungnit, sitamaullutik Inuit Angirutitigut Katujjiqatigiingujunit aaqqiigutausimaniqarningagut Inuit Tapiriit Kanatami (ITK) Katimajuunit. Inuit-Canadami Gavamakkut angirutigisimajangit ilitaqsisimavut ammalu nalunaiqsisimallutik pijungnautiqarninginik Inuit tunngavvigilugit uqaqtausimaningit Aviktuqsimaningit 35-ngani Canadaup Piquarjuaqutinginni. Taakkua nalunaiqsisimajjutiuliqtut saqqitausimalilauqtut ukiunut amisukallaujunut angiqatigiigaasuarutiusimalilaurninginnit ammalu maligatigut aivajjutausimalilauqtillugit ammalu katiqsuanguvalliasimallutik pijausimalilauqtunit angiqatigiigaasuarutiuvalliatillugit Inuit-Canadami Gavamakkut angirutilirinirmi.

Taakkua Angirutiusimajuit, angiqatigiigasuarutiusimallutik angirutigijausimajuummata sitamaullutik Inuit Angirutitigut Katujjiqatigiigijaujunit ammalu Canadami Gavamakkunginnit, ilaqaqput amisukallaujunik ammalu nalunaijaqtausimallutik taimautitausimajunik turaangajunut ilagijauqataunirnut ammalu nunaqaqtuuninginnut Inuit Angirutitigut Katujjiqatigiingujuit iluaniittuni - taimautitaujut Canadami Gavamakkunginit pijausimajariaqaqtitaujunit ammalu angirutigisimalilauqtanginik qularnarniqaratik nalunaiqtausimajunik pijutigisimallugit Inuit kikkuumngangaata.

Inuit Angirutitigut Katujjiqatigiingit aaqqiksuiqatigiilauqtut gavamatuqakkut Inuit Nunanganni Maligaqutingannik piliriqatigillugit Canadami Gavamangat. Taakkua Maligaqutiit tunngavviqaqtitausimavut ilitaqsisimanirnut Inuit taimannganituqamit pijungnautiqaqtuuninginnit ammalu angirutigijausimajutigut pijungnautigijanginik ammalu nalunaiqsisimajjutiullutik Inuit ilagijaujuuningita Inuvialuit Aviktuqsimanirmi Kuapuriisanganut, Nunavut Tunngavik Timiqutinganut, Makivikkunnut, ammalu Nunatsiavut Gavamanganut.

Aaqqigiarutiulirunnarajarmat ulurianammariliqsimallutik sulinngittuullutik inuunirautiuqattaliqtunut piliriangusimalirunnarmat gavamatuqakkunni iqqanaijarvigijaujuit piliriaqalirajarninginik atuliqtitausimaliqullugit Inuit Nunanganni Maligaqutingita nalunaiqsisimalirutiutitsilutik kisimituaq taikkua Inuit Angirutitigut Katujjiqatigiigijangit ammalu ilagijauqataujuit atuinnauvviujunnarningita gavamatuqakkut pilirianginnut, maligaqutinginnut ammalu piliriariliqsimajanginnut turaangatitausimallutik ikajurutiksauninginnit Inungnut.

Silattuqsaqvingmi iqqanaijarvigijaujuit ammalu asingit iqqanaijarviujuit taimaaktauq piliriniqaqsimaliriaqaqtut atuliqtittisimalirlutik timiujutigut ilagijaujunnarnilirinirmi maligaqutigijaujunik tunngavviqaqtittisimaniujunik Inuuninginnut tukigijaujutigijaujunut, tunngavvigijaqaqtitausimalutik



ilitarijausimajjutinik kinauninginnut titiqqaqutitigut taimautitausimajunit Inuit Angirutitigut Katujjiqatigiinginnit Inuunngittuit aturnirluksimavaqunagit pisimalirviujunnaqtunit turaangatitausimajunit Inungnut.

Taikkua kikkutuinnat sulinnngittuullutik ilagijauqatauniraliqpaktut ilitarijausimajuullutik Nunaqaqqaqsimajuni inuuqatigiingujunut pisimalirasuarutigillugit kiinaujaqutiksant, pijunnautigijajunit ammalu kinauninginnut nalunaikkutarijajunit pirajaktuuvammata naammangillariktutigut aulatsiniulilauqsimajutigut ilainnaaqtsijuuvtut aanniqtirituinnaratik Inungnit sangutittisimaliqpannirmiktigut pijausimajariaqallariktunit kiinaujaqutiksaujunit inuuqatittinnit kisaniluttauq, ilaannikkut, saqqitaujunnaqtutigut maligaqutinik siqumitsillutik pirajangniusimalirunnarmata. Gavamatuqakkut nuqqaqtittisimajariaqallariliqtut taassuminga pitsiaqtuujariaqarnirmik naammangillariktutigut siqumittisimaliqpanniujunik ammalu maligaqutinik siqumittisimalirutiujunnaqtunik pasijaksannguqtitalutik.

Gavamatuqakkunni ammalu asinginit gavamaujuni sivuliqtigijajuit sivuliqtunirminnik takuksauliqtittijariaqatut ammalu Nunaqaqqaqsimajuit pijunnautigijangit ammalu kinauninginnut nalunaiqtausimajutingit suruqtautittailirlugit qipiluksimalirlugit nuqqaqtittisimalirlutik NunatuKavut Nunaliujumi Katimajigijajunik (NCC) ammalu asinginik pirajaktuullutik katujjiqatigiingujunik aturniluliqsimanasuktunik inungnik, saalaqarasuaqsimajunik pittiaqsimanasuksugit angirutigijausimalilauqtunik ammalu aksururutigimmariksugit Inuit-Canadami Gavamakkut angirutigisimalilauqtanginnik, ilaqaqtillugit pijunnautigijajunik asingita Nunaqaqqaarsimajunit. Pijunnautigijatta ammalu piusituqarijatta sivunittinni taimaunginnaqtitaujunnarniarningit tamakkununga tunngavviqallaringmata.

Taakkununga tusaqtitaugiakkannirumajut, qaujigiarviqarunnaqtut qaritaujatigut uvani www.itk.ca/open-letter-false-claims-to-Inuit-identity.

Nakummek



Natan Obed, Angijjuqaaq

Inuit Tapiriit Kanatami (ITK) Canadalimaami pijutiqaqtigijauvut Inungnut Canadamiutaujunit, amisuuniqsait Inuit Nunangannirmiutaullutik, Inuit nunagijatuqanganni 51-ni nunaligijajuni Inuvialuit Aviktuqsimaningani (Nunatsiaq), Nunavutmi, Nunavikmi (Quebec), ammalu Nunatsiavutmi (Labrador). Inuit Nunangata angitigininga 40 percent-luanguvut Canadaup nunangata angininganit ammalu 72 percent-ngit anginiqsamik tariut sigjagijangini.

